



BIDANG FOKUS :

# KESEJAHTERAAN KOMUNITI



**BIDANG FOKUS: KESEJAHTERAAN KOMUNITI**

# MENJAMIN KESEJAHTERAAN KOMUNITI

**// Yayasan JCorp telah membelanjakan sejumlah RM2.1 juta yang memberi manfaat kepada 84,590 orang penerima bantuan... //**



Fokus utama program ini adalah untuk membantu kelompok komuniti yang terjejas oleh pandemik COVID-19 di bawah inisiatif tanggungjawab sosial korporat JCorp dan syarikat Kumpulan seperti Kulim (Malaysia) Berhad, KPJ Healthcare Berhad, QSR Brands (M) Holdings Bhd, JLand Gorup Sdn Bhd, Waqaf An-Nur Corporation Berhad. Orang ramai turut

memberi sumbangan untuk membantu inisiatif berkaitan.

Di sepanjang tahun 2022, Yayasan JCorp telah membelanjakan sejumlah RM2.1 juta yang memberi manfaat kepada 84,590 orang penerima bantuan berdasarkan kategori sumbangan berikut:

**Fakta Ringkas**

Kesejahteraan Komuniti





Sumbangan tersebut telah dimanfaatkan seperti berikut:

## 1. Yayasan Kanser Tunku Laksamana Johor

Sebagai tanda sokongan dan dalam usaha membantu pejuang kanser, Yayasan JCorp telah menyumbang sebanyak RM149,800 kepada Yayasan Kanser Tunku Laksamana Johor. Antara program yang telah dijayakan ialah Laksamana Neon Run, Jom Tengok Wayang bersama pejuang kanser kanak-kanak, Ujian HPV dan rawatan biopsi bagi pengesanan awal kanser.

Yayasan JCorp bersama syarikat Kumpulan JCorp iaitu Kulim (Malaysia) Berhad, KPJ Healthcare Berhad, QSR Brands (M) Holdings Bhd dan JLand Group Sdn Bhd turut menyumbang RM50,000 menerusi pembelian meja semasa penganjuran Majlis Makan Malam Amal Rays of Light yang diadakan pada 2 Disember 2022 bertempat di Pusat Konvensyen Antarabangsa Persada Johor, Johor Bahru. Sumbangan ini yang telah diserahkan kepada Permasuri Johor, DYMM Raja Zarith Sofiah Binti Almarhum Sultan Idris Shah menunjukkan komitmen Yayasan JCorp dalam menyokong dan membantu pejuang-pejuang kanser.

## 2. Tabung Kebajikan dan Pembangunan Pelajar UTM

Yayasan JCorp bersama syarikat Kumpulan JCorp iaitu Kulim (Malaysia) Berhad; KPJ Healthcare Berhad; QSR Brands (M) Holdings Bhd dan JLand Group Sdn Bhd telah memberikan sumbangan sebanyak RM500,000 untuk membantu pelajar Universiti Teknologi Malaysia (UTM) khususnya daripada golongan B40 di mana dana ini boleh digunakan untuk membiaya yuran pengajian pelajar dan lain-lain keperluan.

Sumbangan telah disampaikan oleh Encik Rozaini Mohd Sani, Pengerusi Yayasan JCorp kepada YBhg Prof Datuk Ts. Dr. Ahmad Fauzi Ismail, Naib Canselor UTM.



## 3. Dana Pendidikan Khas

Kulim (Malaysia) Berhad (KULIM) dengan sokongan divisyen Agrofarm dan Yayasan JCorp telah membina rumah hijau agroterapi dalam kawasan Persatuan Cerebral Palsy Johor (CPJ) yang membolehkan persatuan tersebut menjalankan pelbagai aktiviti seperti menyediakan agroterapi untuk pelajar dan perantis bengkel vokasional dengan Cerebral Palsy (CP) di samping membuka peluang menjana pendapatan tambahan melalui penjualan hasil tanaman.

Pembangunan rumah hijau yang bernilai RM40,000 ini membolehkan CPJ memulakan penanaman dalam persekitaran yang kondusif dan mampan. KULIM menunjukkan komitmen yang tinggi untuk memastikan kejayaan program dengan memberikan khidmat nasihat, latihan serta melakukan pemantauan berkala.

Yayasan JCorp juga telah memperuntukkan sebanyak RM18,000 bagi menaik taraf makmal komputer bagi tujuan pembelajaran melalui pembelian peralatan komputer dan alat bantu mengajar khusus kepada pelajar dan perantis bengkel vokasional.





#### 4. Misi Bantuan Banjir

Yayasan JCorp disokong oleh JCorp dan syarikat Kumpulan telah menggerakkan kempen bagi membantu anggota pekerja Kumpulan yang terkesan akibat banjir di Selangor dan Kelantan. Melalui kempen #kitabantukita seluruh anggota pekerja menunjukkan dasar keprihatinan untuk membantu dan memberikan sokongan antara satu sama lain.

Bantuan wang tunai berjumlah RM150,000 telah disampaikan kepada 217 orang anggota pekerja melalui wakil-wakil syarikat iaitu KPJ Healthcare Berhad dan QSR Brands (M) Holdings Bhd.

Selain itu, Yayasan JCorp turut menjalinkan kerjasama dengan Southern Volunteers di mana peruntukan sebanyak RM50,000 diberikan untuk membantu mereka menyelaras aktiviti bantuan pasca banjir di negeri Johor iaitu di daerah-daerah yang terkesan akibat banjir seperti Segamat, Tangkak, Muar dan Batu Pahat.

#### 5. Bank Makanan & Kotak Makanan

JCorp menerusi Yayasan JCorp telah mengedarkan kotak barangan makanan asas kepada 150 keluarga asnaf dan B40 di sekitar Mukim Johor Bahru, Mukim Plentong dan Mukim Pulau. Kurniaan kotak barangan makanan asas ini adalah bersempena dengan Ulang Tahun Keputeraan DYMM Permaisuri Johor pada 14 Ogos, 2022 bertujuan meringankan beban kewangan Bangsa Johor.

Selain itu, Yayasan JCorp turut meneruskan tanggungjawab sosial korporatnya dengan menyumbang 100 bakul makanan sempena Program Ihya Ramadan : Simbiosis Mawaddah, Mujahadah Demi Rahmah 2022 yang dianjurkan oleh Bahagian Pengurusan Sumber Manusia, Pejabat SUK Johor. Sumbangan makanan asas

ini diedarkan kepada pesara, penjawat awam, atlet, orang awam dan penerima zakat di seluruh daerah negeri Johor.

Yayasan JCorp turut memperuntukkan sebanyak RM10,000.00 bagi tujuan sumbangan tunai dan bakul makanan kepada anggota pekerja JCorp dan syarikat Kumpulan menerusi Program Amal Ramadan Mutiara Johor Corporation.

#### 6. Sukarelawan Sahabat Yayasan JCorp

Sempena Ramadan 2022, Yayasan JCorp telah menyumbang 5 kawah bubur lambuk bersempena Program Bubur Lambuk JohorFM Pandu Lalu bertempat di Kompleks Penerangan dan Penyiaran Sultan Iskandar, Johor Bahru. Selain diedarkan kepada orang ramai, bubur lambuk tersebut turut diedarkan kepada anggota pekerja syarikat Kumpulan JCorp di Menara KOMTAR, JBCC. Sukarelawan Sahabat YJC, Briged Waqaf dan Southern Volunteers telah memberikan kerjasama dan komitmen tinggi dengan membantu kerja-kerja menyediakan bubur lambuk seperti memasak, membungkus dan mengedarkannya kepada orang ramai.

Sebagai tanda sokongan dan prihatin kepada komuniti, Yayasan JCorp telah berpeluang menyertai Program Jelajah Kami Prihatin 'Kasih JohorFM' anjuran Kelab RTM Johor Bahru di Kampung Paya, Jalan Kampung Tengah Kluang, Johor. Seramai 20 Sukarelawan Sahabat YJC yang terdiri daripada anggota pekerja Kulim (Malaysia) Berhad, KPJ Healthcare Berhad dan Johor Land Berhad turun padang bagi membantu membersihkan kawasan rumah dan sekitarnya. Selain itu, Yayasan JCorp turut menyumbang barang keperluan rumah seperti meja makan, periuk, dapur gas serta barangan makanan.





// **Shine for World Heart Day** bertujuan memberikan kesedaran kepada masyarakat mengenai penyakit kardiovaskular (CVD) yang merupakan punca utama kematian rakyat Malaysia. //



## 7. Pertubuhan Kebajikan dan Rumah Anak-Anak Yatim

Sempena Sambutan Aidilfitri 2022, Yayasan JCorp telah menyantuni Pertubuhan Kebajikan & Rumah Anak Yatim Safar, Rumah Anak Yatim Raudhatul Maryam, Pusat Perlindungan Baitus Solehah, Rumah Barkat Johor dan Pertubuhan Kebajikan Fitrah Qaseh di Majlis Sambutan Aidilfitri Johor Corporation. Sumbangan berjumlah RM10,000 telah disampaikan oleh YAB Menteri Besar Johor.

## 8. World Heart Day & Pinktober Run 2022

Yayasan JCorp telah melaksanakan pelbagai aktiviti yang bukan sahaja untuk memperluas peranan bahkan untuk memperkenalkan dan memperkukuh jenama Yayasan JCorp dalam kalangan orang ramai. Justeru, Yayasan JCorp dan syarikat Kumpulan JCorp iaitu Kulim (Malaysia) Berhad; KPJ Healthcare Berhad; QSR Brands (M) Holdings Bhd dan JLand Group Sdn Bhd telah memperuntukkan sebanyak RM150,000 untuk program *Shine for World Heart Day* dan *Pinktober Run*.

*Shine for World Heart Day* bertujuan memberikan kesedaran kepada masyarakat mengenai penyakit kardiovaskular (CVD) yang merupakan punca utama kematian rakyat Malaysia. Pameran MEGAHeart iaitu pameran jantung mudah alih dan interaktif dunia yang memberikan maklumat secara terperinci mengenai fungsi jantung telah diadakan bersempena program ini. Selain itu, KPJ Healthcare Berhad Wilayah Selatan iaitu Hospital Pakar KPJ Johor, Hospital Pakar KPJ Pasir Gudang, Hospital Pakar KPJ Bandar Dato' Onn dan Hospital Pakar KPJ Puteri turut mengadakan pemeriksaan kesihatan percuma merangkumi pemeriksaan tekanan darah, paras gula dalam darah, pemeriksaan fizikal (berat dan BMI),



konsultasi secara percuma, pemeriksaan Fungsi Lipid dan Hati secara percuma, demonstrasi CPR, kempen derma darah dan ceramah penjagaan kesihatan jantung.

Manakala bagi program *Pinktober Run 2022* pula, seramai 1,500 peserta telah memeriahkan program yang diadakan di Pusat Konvensyen Antarabangsa Persada Johor. Selain daripada memberi kesedaran kepada masyarakat berkaitan kanser payudara khususnya dalam kalangan wanita di Malaysia program ini turut mendidik masyarakat supaya mengamalkan gaya hidup sihat. Penganjuran pelbagai program seperti ini menunjukkan komitmen tidak berbelah bahagi Yayasan JCorp untuk meningkatkan kualiti hidup komuniti.

## 9. Bantuan Fasiliti Sekolah

Yayasan JCorp turut memperuntukkan RM10,000 bagi membantu sekolah dalam menaik taraf fasiliti dan kemudahan yang sedia ada. Bantuan ini termasuklah pembelian peralatan bilik darjah, naik taraf surau dan dewan terbuka, pembelian meja dan kerusi, pemberian komputer terpakai.